



KO TE

# KAHITI O NIU TIRENI.

HE MEA TA I RUNGA I TE MANA O TE KAWANATANGA.

---

 PONEKE, TAITE, HEPETEMA 20, 1906.
 

---

## TARI WHAKAHAERE I NGA MAHI AHU WHENUA O NIU TIRENI.

(JOHN D. RITCHIE, Hekeretari.)

### KUPU TOHUTORU MO TE WHAKATO I NGA KAI E WHAI AKE NEI.

*Tanapu (Turnips)*, ara, nga tu ahua e pai ana hei whakato ki roto ki nga kaari. Ko te wa hei ruinga i nga purapura, me timata i Akuhata tae noa ki a Maehe. Ka oti te karikari o te maara me rakaraka kia kore rawa he pokurukuru. Hei te rangi paki ka mahi i nga raina (drills) ka rui i nga purapura, kia kore ai te oneone e piri ki te rakaraka. Me hanga nga raina (drills) kia rua inihi te hohonu a kia tekau ma rima inihi te tatahi. Kia tatahi te rui i nga purapura kei puputu rawa te tupu ake. Ki te puputu rawa ka uaua te hutihuti kia tatahi a he maha nga mea e kino. Ka rarahi nga tupu ara ka taea te nanao e te ringa me hutihuti etahi, ko nga mea e waiho kia tupu kia ono kia waru ranei inihi te tatahi.

Kaua e ruia kia nui rawa i te ruinga kotahi, notemea ina hutia hei kai kaore e taea te rongoa mo te wa roa. Ruia kia iti te maara, a kia pau nga wiki e ono ka rui atu ano kia pera ano te rahi, me pera tonu te rahi o te mahi ia ono wiki a taea noatia nga ra o Maehe, a hei taua marama ka rui kia rahi noa atu te maara hei kai mo te hotoke, notemea kei te hotoke ka taea te rongoa nga tanapu, e kore e pirau wawe.

*Tuwiiti Tanapu (Swede Turnips)*.—Ko nga ra hei ruinga, ko nga ra whakamutunga o Oketopa tae noa ki te mutunga o Noema. Me karikari te maara ka rakaraka kia kore he pokurukuru, a hei te ra paki ka rui. Kia tekau ma rima inihi te tatahi o nga raina (drills), a kia rua inihi te hohonu. Ka tupu ake, ka rarahi, ara, kia taea e te ringa te nanao, me hutihuti etahi; ko nga mea e waiho kia tekau ma rua inihi te tatahi. Me rui kia rahi te maara, notemea ka mau tonu e kore e pirau a pau noa te hotoke.

*Kareti (Carrots)*.—Ko nga wa hei ruinga ko Akuhata, ko Hepetema, ko Oketopa ranei, kia ai ai hei kai mo te raumati tae atu ki te hotoke. Kia rua inihi te hohonu o nga raina (drills). Me karikari te maara kia ngawari, kaua he pokurukuru kaua he taru. Kia tatahi te rui i nga purapura notemea he uaua rawa te hutihuti kareti kia tatahi ina puputu te tupu ake.

*Purapura Kapeti (Cabbage seed)*.—Hei kai mo te raumati me te ngahuru, me rui nga purapura i Akuhata i nga ra tuatahi ranei o Hepetema. Hei kai mo te hotoke, me rui i te whakamutunga o Noema i te tinatanga ranei o Tihema. Me rui nga purapura ki te maara iti, mama te oneone, taru kore. Kaua e puputu rawa te rui. Ka mutu te rui me rakaraka te maara. Ki te haere te manu ki te kai i nga purapura me hui atu ki te rarauhe, kia tupu ake ka tango atu. Me rangaranga nga kapeti e rite ana mo te pera. Me kowhiti ko nga kapeti rarahi ka rangaranga ko era. Me rarangi te whakato kia toru tekau inihi te tatahi, a kia pera ano hoki te tatahi i roto i nga raina. Kia rarahi ake etahi ka rangaranga atu ano, a me pera haere tonu. Kaua e tukuna kia nunui rawa nga kapeti ka rangaranga ai, kei ngehe kei tokoroa te tupu.